

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 21/6

30 օգոստոսի 2016թ.

Քննարկվեց քաղաքացի Հովհաննես Բադալյանի գանգատը ՀՀ ֆինանսների նախարարի տեղակալի վարչական իրավախախտման գործի վերաբերյալ 19.02.2016թ. թիվ 315905 որոշման դեմ:

Հովհաննես Բադալյանի գանգատում բերված փաստարկները.

Սույն թվականի հուլիսի 13-ին փոստային ծառայության միջոցով Հովհաննես Բադալյանին է հանձնվել ՀՀ ֆինանսների նախարարի տեղակալի 19.02.2016թ. թիվ 315905 որոշումը:

Փաստերը, որոնց հիման վրա կայացվել է որոշումը չեն համապատասխանում իրականությանը: Այսպես, թիվ 5012732 հանձնարարագրով բացված ստուգման ընթացքում Հովհաննես Բադալյանի կողմից տրամադրվել են այն բոլոր փաստաթղթերը, որոնք պահանջվել են ստուգող պաշտոնատար անձանց կողմից: Հակառակ դեպքում հնարավոր չէր լինի իրականացնել դրանց ստուգումը և արդյունքում «Արգիշտի» ՍՊԸ-ին առաջադրել պարտավորություններ (տուգանք): Վարչական վարույթի նյութերից հստակ երևում է, որ իր կողմից տրամադրվել են պահանջվող փաստաթղթերը, ինչի մասին է վկայում այն հանգամանքը, որ ստուգում իրականացնողների կողմից թիվ 5012732 ակտում նշվել է, որ տվյալները ստացվել են ներկայացված փաստաթղթերի հիման վրա:

Ինչ վերաբերվում է փաստաթղթերի պահպանության պարտականությունը չկատարելուն, ապա այդ պնդումը նույնպես չի կարող համապատասխանել իրականությանը, քանի որ գանգատաբերի կողմից ներկայացվել են պահանջվող փաստաթղթերը: Փաստաթղթերը սահմանված կարգով ներկայացված լինելու հանգամանքը հնարավոր է պարզել թիվ 5012732 հանձնարարագրով բացված ստուգման նյութերից:

Հաշվի առնելով վերոգրյալը՝ գանգատաբերը խնդրում է վերացնել ստուգումն իրականացնող պաշտոնատար անձանց գործողությունները խոչընդոտելու կապակցությամբ ընդունված 19.02.2016թ. թիվ 315905 որոշումը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ֆինանսների նախարարի տեղակալը քննելով 23.12.2015թ. հարկ վճարողի խոչընդոտող գործողությունների մասին արձանագրությունը և կից նյութերը՝ ՀՀ ՖՆ 23.10.2015թ. թիվ 5012732 հանձնարարագիրը, Աշտարակի ՏՀՏ հարկային հսկողության, ՍԿԴ վարչության ստուգումների 1-ին բաժնի աշխատակիցների, «Արգիշտի» ՍՊ ընկերության տնօրեն Հովհաննես Բադալյանի բացատրությունները պարզել է, որ ՀՀ ՖՆ 23.10.2015թ. թիվ

5012732 հանձնարարագրով Աշտարակի ՏՀՏ և ՍԿԴ վարչության 1-ին բաժնի աշխատակիցները «Արգիշտի» ՍՊԸ-ում պետք է իրականացնեին բյուջեի հետ փոխհարաբերությունների ճշտության ստուգում: Նշված ստուգումն իրականացնելու նպատակով պաշտոնատար անձինք այցելել են «Արգիշտի» ՍՊԸ հասցեով և տեղեկացել, որ ընկերության տնօրեն Հովհաննես Բադալյանը չի ներկայացնում ստուգվող ժամանակաշրջաններին վերաբերվող անհրաժեշտ սկզբնական հաշվապահական փաստաթղթերը, բացակայում է աշխատավայրից, չի պատասխանում հեռախոսազանգերին, խուսափում է ծանոթանալ ստուգման ժամկետը երկարաձգելու և ստուգումը կասեցնելու վերաբերյալ ՀՀ ֆինանսների նախարարի հրամաններին՝ խոչընդոտելով ստուգման ընթացքին:

Վարույթի ընթացքում Հովհաննես Բադալյանի կողմից տրված բացատրության համաձայն՝ ընկերության փաստաթղթերը գտնվում են հիմնադիրների մոտ: Նկատի ունենալով, որ համաձայն «Հաշվապահական հաշվառման մասին» ՀՀ օրենքի 19-րդ հոդվածի 3-րդ մասի՝ հաշվապահական հաշվառման փաստաթղթերի պահպանումը կազմակերպելու պատասխանատվությունը կրում է կազմակերպության ղեկավարը և ղեկավարվելով Վարչական իրավախախտումների վերաբերյալ ՀՀ օրենսգրքի 35-րդ և 282-րդ հոդվածներով, ՀՀ ֆինանսների նախարարի տեղակալը 19.02.2016թ. կայացրել է վարչական իրավախախտման գործի վերաբերյալ թիվ 315905 որոշումը, որով «Արգիշտի» ՍՊԸ տնօրեն Հովհաննես Բադալյանը Վարչական իրավախախտումների վերաբերյալ ՀՀ օրենսգրքի 182.1 հոդվածի հատկանիշներով ենթարկվել է վարչական պատասխանատվության՝ գումարով 250.000 դրամի չափով:

Քննարկման ընթացքում պարզվեց, որ վարչական վարույթի շրջանակներում 12.01.2016թ. Հովհաննես Բադալյանի կողմից տրվել է գրավոր բացատրություն, որում ստուգմանը վերաբերվող համապատասխան փաստաթղթերը չներկայացվելու վերաբերյալ հարցադրմանն ի պատասխան նա մասնավորապես նշել է, որ երբևէ ստուգող տեսուչների աշխատանքներին չի խոչընդոտել, ներկայացրել է իր տիրապետման տակ գտնվող բոլոր փաստաթղթերը: Իր բացատրությունում Հովհաննես Բադալյանը նշել է նաև, որ կփորձի կապ հաստատել ընկերության հիմնադրի հետ՝ ստուգող անձանց կողմից պահանջվող փաստաթղթերը ներկայացվելու համար: Բացի այդ, նա իր պատրաստակամությունն է հայտնել աջակցել ստուգող տեսուչներին, վերջիններիս կողմից սահմանված կարգով ստուգում իրականացվելու համար:

Քննարկման ընթացքում պարզվեց նաև, որ վերոգրյալ բացատրությունը տալուց հետո Հովհաննես Բադալյանը հանդիպել է ընկերության հիմնադրին, նրանից վերցրել է ստուգումն իրականացնող անձանց կողմից պահանջված բոլոր փաստաթղթերը և փոխանցել վերջիններիս: Ընդ որում հարկ է նշել, որ փաստաթղթերի տրամադրումը կատարվել է մինչև վարչական իրավախախտման գործի վերաբերյալ 19.02.2016թ. թիվ 315905 որոշման կայացնելը:

Տվյալ դեպքում Հովհաննես Բադալյանը 19.02.2016թ.-ին նշանակված գործի քննության չմասնակցելու հետևանքով վարույթն իրականացնող վարչական մարմնին չի կարողացել տեղեկացնել ստուգմանը վերաբերվող բոլոր փաստաթղթերը ստուգող անձանց տրամադրված լինելու մասին: Իր հերթին, վիճարկվող որոշումը կայացնելիս վարույթն իրականացնող վարչական մարմնի կողմից չեն ձեռնարկվել համապատասխան միջոցներ, վարույթի հարուցման համար հիմք հանդիսացած հանգամանքը վերացած լինելու փաստը պարզելու ուղղությամբ:

Այս կապակցությամբ հարկ է նշել, որ Վարչական իրավախախտումների վերաբերյալ ՀՀ օրենսգրքի 279-րդ հոդվածի համաձայն՝ վարչական իրավախախտման վերաբերյալ գործը քննելիս մարմինը (պաշտոնատար անձը) պարտավոր է պարզել՝ կատարվել է, արդյոք, վարչական իրավախախտում. արդյոք, տվյալ անձը մեղավոր է այն կատարելու մեջ. արդյոք, նա ենթակա է վարչական պատասխանատվության:

Հանձնաժողովը գտնում է, որ քննարկվող դեպքում վարչական իրավախախտման գործի վերաբերյալ 19.02.2016թ. թիվ 315905 որոշումը կայացվել է վերոգրյալ իրամանորմի պահանջների խախտմամբ:

Ելնելով վերոգրյալից և ղեկավարվելով «Վարչարարության հիմունքների և վարչական վարույթի մասին» ՀՀ օրենքի 63-րդ հոդվածի 1-ին մասի ա) կետի դրույթներով Հանձնաժողովը գտնում է, որ գանգատը ենթակա է բավարարման:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը

ո Ր Ո Շ Ո Ւ Մ Է՝

Բեկանել ՀՀ ֆինանսների նախարարի տեղակալի վարչական իրավախախտման գործի վերաբերյալ 19.02.2016թ. թիվ 315905 որոշումը, իսկ գործը՝ կարճել:

Հանձնաժողովի նախագահ՝



Վ.ՄԻՐՈՒՄՅԱՆ